

សេចក្តីថ្លែងប្រាប់

AWIG-AWIG

ក្រុងប្រាសាទជ្រុងស្រី

DESA PAKRAMAN JUNGSRI



ក្រុងប្រាសាទជ្រុងស្រី

KECAMATAN BEBANDEM

ក្រុងប្រាសាទជ្រុងស្រី

KABUPATEN KARANGASEM

ឆ្នាំ ២០០៣

TAHUN 2003

MURDDHA CITTA

Om Swastyastu, Om Awighnamastu nama siddham.

Malarapan saking panghyangning Ida Sang Hyang Widhi Wasa asung kerta nugraha ngawentenang kahuripan sakala niskala, ring Bhuana agung lan bhuana alit. Manut dresta desane wantah pawakan pasayuban Krama Desa rawuhing kulawarga pawongannya. Desane kamanggehang bhuana agung, pawongannya soang-soang pinaka bhuana alit.

Sotaning bhuana agung, desane wantah pawakan bhawana mahurip jangkep saha Tri Hita Karananya, luwire:

- ha. Parhyangan, sahananing kahyangan panyiwian desa genah ngarcana Ida Hyang Parama Wisesa maka jiwana desane.
- na. Pawongan, krama saha warga desa maka sami mapawakan bayu pramana, mawinan desane sida molah maprawerti.
- ca. Palemahan, tanah kakuwuban desa sinanggeh stulaning desane.

Putusing paseban Krama Desa Pakraman Jungsrri, gumawe awig-awig Desa Pakraman maka sipat siku-siku pameneh, wastu prasidha, prayojanan mami kabeh prasama angidep muwah amagehaken kadi linging awig-awig iki.

PIDAGING
AWIG-AWIG DESA PAKRAMAN JUNGSRRI

PRATAMA SARGAH : ARAN LAN WAWIDANGAN DESA	1
DWITYA SARGAH : PATITIS LAN TATUJON	1
TRITIYA SARGAH : SUKERTA TATA PAKRAMAN	2
Palet 1 Indik Krama	2
Palet 2 Indik Prajuru Desa	5
Palet 3 Indik Kulkul	6
Palet 4 Indik Paruman.....	7
Palet 5 Indik Druwen Desa	8
CATURTHA SARGAH : SUKERTA TATA PALEMAHAN	9
Palet 1 Karang, Tegal lan Bangket	9
Palet 2 Kakayonan	11
Palet 3 Wawangunan	11
Palet 4 Wawalungan	12
Palet 5 Sukerta Pamitegep	15
Kaping 1 Indik Bhaya	15
Kaping 2 Panyanggran Banjar	15
PANCAMA SARGAH : SUKERTA TATA AGAMA	15
Palet 1 Indik Dewa Yadnya	15
Palet 2 Indik Resi Yadnya	19
Palet 3 Indik Pitra Yadnya	19
Palet 4 Indik Manusa Yadnya	24
Palet 5 Indik Buta Yadnya	25
SAD SARGAH : SUKERTA TATA PAWONGAN	26
Palet 1 Indik Pawiwahan	26
Palet 2 Indik Palas Marabian	28
Palet 3 Indik Sentana	30
Palet 4 Indik Warisan	30
SAPTAMA SARGAH : WICARA LAN PAMIDANDA	32
Palet 1 Indik Wicara	32
Palet 2 Indik Pamidanda	33
ASTAMA SARGAH : NGUWAH-NGUWUHIN AWIG-AWIG	34
NAWAMA SARGAH : SAMAPTA	34

PRATAMA SARGAH
ARAN LAN WAWIDANGAN DESA

Pawos 1

- (1) Desa Pakraman puniki mawasta Desa Jungsri;
- (2) Wates wewidangannya kadi ring sor:
 - ha. Sisi Kangin Tukad Pati;
 - na. Sisi Kauh Tukad Krekuk;
 - ca. Sisi Kelod Desa Padangkerta;
 - ra. Sisi Kaler Desa Tohpati.
- (3) Desa Pakraman Jungsri puniki kawangun antuk krama banjar Jungsri

DWITYA SARGAH
PAMIKUKUH LAN TATUJON

Pawos 2

Maka pamikukuh Desa Pakraman Jungsri, ngarajegang, mikukuhin kalih mitindihin pisan:

- ha. Pancasila
- na. Undang-undang Dasar 1945
- ca. Tri Hita Karana

Pawos 3

Desa Pakraman Jungsri ngamanggehang tatujon luih ipun:

- ha. Ngukuhang miwah ngarajegang agama Hindu;
- na. Ngarajegang kasukertan Desa saha pawongannya sakala kalawan niskala;
- ca. Ngawangunang katreptiyan sajroning Desa Pakraman mangda kasidan rajeg katreptyaning praja;

ra. Ngawrediyang padruweyaning desa majalaran kawicaksanan guna laksana manut dharma prawertti.

TRITYA SARGAH

SUKERTA TATA PAKRAMAN

Palet 1

Indik Krama

Pawos 4

- (1) Sane kasinanggeh krama desa, inggih punika sang sapisira ugi sane kantun rajeg maagama Hindu; jenek magenah ring wewidangan Desa Pakraman Jungsri utawi magenah ring liwaring Desa Pakraman Jungsri;
- (2) Papalihan krama desa kadi kinucap ring sor:
 - ha. Krama Ngarep, inggih punika krama sane bulangkep, mawiwit saking Desa Pakraman Jungsri saha mapaayah-ayah saurah-arih;
 - na. Krama Sasabu liwaring desa, inggih punika krama bulangkep sane mawiwit saking dura desa hamung sane mapaayahan ring pura Dalem Jungsri;
 - ca. Krama pinaka lingga, Ida Brahmana saking Geria Budakeling;
 - ra. Krama tamiu, inggih punika sang sapa sira ugi saking dura desa magenah ring Desa Pakraman Jungsri, sane tan sareng mapaayah-ayah saurah-arih;
 - ka. Krama truna truni inggih punika krama sane durung bulangkep, sane metu saking krama ngarep kalih krama tan ngarep wiyadin krama tamiu;
 - da. Krama ring dura desa inggih punika, sang sapisira ugi krama ngarep utawi krama tan ngarep wed saking Desa Pakraman Jungsri sane magenah ring dura desa, nanging kantun mipil ring Desa Pakraman Jungsri;
 - ta. Krama balu, wenten kalih soroh inggih punika balu lanang miwah balu istri, yan lanang balu, keni paayah-ayah sakadi paayah-ayah bulangkep, yan istrine balu, tan pasantana tan keni paayah-ayah lan papeson, sakewanten prade

istrine balu masentana lanang, riwekas yan sampun hantes mapaayahan patut katedunang makrama bulangkep;
sa. Krama nyada inggih punika krama sane mapinunas ngaraga pacang marariyan mapaayah-ayah malarapan antuk lingsir, saha polih lugraha saking desa.

Pawos 5

- (1) Tedun makrama desa ngawit saking rahina pasangkepan desa sasampun wusan mawidhi widhana pawiwahan;
- (2) Tedun makrama tamiu sasampun tigang sasih magenah ring wawengkon Desa Pakraman Jungsri ;
- (3) Ngawit tedun dados truna truni, lanangé sasampun mayusa 17 (pitulas) warsa, istrine sasampun ngaraja swala.

Pawos 6

- (1) Wusan dados krama desa luire:
 - ha. Sangkaning seda;
 - na. Sangkaning mapinunas ngaraga risampun polih lugraha saking Desa Pakraman Jungsri ;
 - ca. Tedah utawi tilar saking Agama Hindu;
 - ra. Kaheladang antuk desa sangkaning satata mamurug awig-awig, paswara, lan pararem.

Pawos 7

- (1) Swadharmaning krama desa luire:
 - ha. Krama desa ngarep yogya keni paayah-ayah, urunan miwah papeson cumek;
 - na. Krama sasabu sane magenah ring liwaring Desa Pakraman Jungsri mapaayah-ayah hamung ring Pura Dalem Jungsri;

- ca. Krama pinaka lingga, katuwur antuk desa ritatkalaning wenten hiyosan ring Desa Pakraman Jungsrri, minakadi wenten pabuat desa siosan manut dresta kuna;
- ra. Krama tamiu, yogya ngaturang panahub ka desa ngamasa-masa, sanangken pacaruan desa ring sasih kasanga, minakadi ritatkala ning desa mapwangun, ngayum wawangunan patut ngaturang dana punia sakasidhan;
- ka. Krama truna truni patut ngaremba saraja karya sane kawangun antuk desa;
- da. Krama desa ring dura desa, yogya ngaturang panahub ka Desa ngamasa-masa sanangken pacaruan desa kalaning sasih Kasanga manut pangargan beras 10 Kg, taler ngaturang dana punia ritatkalaning desa mapawangun, ngayum wawangunan sane kadruwe antuk desa, krama suka manut sakasidhan;
- ta. Sajaba sane munggah ring ajeng krana desa samian yogya satinut ring daging awig-awig Desa Pakraman Jungsrri, minakadi pasuaran desa, ngutsahayang mangda kasidan sakadi patitis tatujon desane kamanggehang ring hayun, tumus mamanggulang kajagadhitan praja.

(2) Phala peksaning krama desa kadi ring sor puniki:

- ha. Krama desa samian yogya polih pasayuban saking desa, saluiring wicaranya yogya kabawosan antuk Prajuru Desa manut tata titining wicara;
- na. Krama desa samian wenang ngalaksanayang Panca Yadnya ring sajroning Desa Pakraman Jungsrri, manut desa, kala, patra kalih nganutin sane kinucap sajroning sastra Agama manut dresta;
- ca. Krama desa ngarep miwah krama desa Sasabu sane magenah ring Desa Pakraman Jungsrri, wenang polih babagian layuban aci-aci saluir ipun, twas-twasan, miwah siosan sane patut katiba ring krama desa.

Palet 2

Indik Prajuru Desa

Pawos 8

(1) Desa Pakraman Junggri kaenterang antuk Prajuru Desa;

(2) Prajuru Desa Pakraman Junggri luire:

ha. Bendesa utawi Keliang Desa;

na. Pamaden Bendesa utawi Pamaden Keliang Desa;

ca. Panyarikan;

ra. Sedahan utawi Juru Raksa;

ka. Patangan utawi Panglima.

Pawos 9

Sane wenang kaadegang dados Prajuru Desa:

ha. Krama ngarep katurunan purusa I Kreceh sane sareng madadia ring padadian
I Wayan Purni;

na. Prade tan wenten sekadi inucap ring ajeng dados mamilih krama ngarep sane
siosan;

ca. Tan cedangga, sakadi: peceng, perot, cungh lan sapanunggalan ipun;

ra. Wikan mamawos kalih nyurat aksara Bali utawi latin;

ka. Tan nahen mabukti malaksana corah;

da. Mungging ngadegang* Prajuru Desa, kasudi antuk krama desa sane
kabriyukin antuk paruman desa.

ta. Lamine madeg prajuru desa wantah 5 (limang) warsa, sajaba
kapadgatakalan.

Pawos 10

Swadharmaning Prajuru Desa luire:

- ha. Ngalaksanayang awig-awig desa, pasuara miwah pamutus pararem desa;
- na. Nuntun tur ngenterang krama Desa rauhing warga desa ngupadi patitis;
- ca. Mawosin kalih ngicen tatimbang, niwakang pamutus sahanan wicara sane metu ring desa;
- ra. Maka duta desa matemuang babawos ring sang sapa sira ugi.

Pawos 11

Patuas utawi olih-olihan Prajuru Desa luire:

- ha. Luput papeson;
- na. Polih babagian kalih tanding.

Pawos 12

(1) Prajuru Desa kagentosin riantukan:

- ha. Seda;
- na. Mapinunas sangkaning rahayu sasampun polih lugraha saking paruman desa;
- ca. Macihna sungkan-sungkanan;
- ra. Mabukti iwang, nilar swadharman prajuru;
- ka. Majalaran sampun tutug sengker..

Palet 3

Indik Kulkul

Pawos 13

(1) Kulkul ring desa luire:

- ha. Kulkul Desa;

- na. Kukul Pura;
- ca. Kukul Sekeha-sekeha.

(2) Tabuh utawi tatepakan kukul desa manut pasobaya minakadi dresta kuna.

Pawos 14

- (1) Kukul desa tan wenang katepak yening tan sangkaning pituduh Prajuru Desa, sajawaning tengeran kapancabhaya;
- (2) Sang nepak kukul tan sangkaning pituduh Prajuru Desa, patut digelis matur supeksa manut kabuatan panepake, yan hana mamurug kadanda beras 100 Kg;
- (3) Suaran kukul sekeha-sekeha miwah kukul sawosan tan wenang pateh ring suaran kukul desa, yan prade macihna pateh suarane, patut kukul inucap kapastika, mangda suaran ipun masawosan.

Palet 4

Indik Paruman

Pawos 15

- (1) Paruman utawi sangkepan ring Desa Pakraman Junggri wenten:
 - ha. Sangkepan Desa kawentenang nyabran sasi' kala dina Buda Kliwon;
 - na. Paruman kawentenang padgata kala majalaran arahan manut tatujon;
 - ca. Sangkepan Prajuru Desa kawentenang manut sakabuatan;
 - ra. Sangkepan sekeha-sekeha manut sakabuatan.
- (2) Sangkepan Desa madudonan sakadi ring sor puniki:
 - ha. Prasida lumaksana risampun katedunin antuk sang ngamiletin, kemanggala antuk tengeran kukul, miwah mabusana adat nyelempot, saha makta prabot sakaluire, tan maren ngarcana ring Ida Bagawan Panyarikan, malarapan antuk cane;

- na. Sane kabawos kasep, minakadi malancirin kacihnayang antuk toyan janggi, sane ngawaris tan rawuh kawastanin nora tedun;
- ca. Tan kalugra ngawetuang babawos sugal, camil, wak parusia utawi biota, yan wenten mamurug keni pamidanda pacamil tan trepti, mahayu minakadi panyangaskara manut pasuara.

Pawos 16

- (1) Sajroning sangkepan Prajuru Desa patut ngerabang:
 - ha. Padruweyan Desa;
 - na. Pangrencana mwanng usaha Desa;
 - ca. Tatepasan mwanng pamutus wicara;
 - ra. Pituduh sang amawarat sane patut katiwakang ring desa.
- (2) Pamutus paruman desa sinanggeh pararem maka pamitegep pamargin awig-awig.

Palet 5

Indik Druwen Desa

Pawos 17

Druwen Desa Pakraman Jungsri sakadi sane sinanggeh ring sor puniki:

- (1) Kahyangan desa sane wenten ring wawidangan Desa Pakraman Jungsri luire:
 - Pura Puseh, Pura Dalem, Pura Ulun Swi, lan Pura Pasucian;
- (2) Tanah palaba pura, marupa tanah tegalan;
- (3) Tanah Palaba Pura, marupa bangket;
- (4) Setra wenten kalih palebahan;
- (5) Angklung abarung;
- (6) Ilen-ilen pujawali ring pura;
- (7) Lembaga Perkreditan Desa.

Pawos 18

- (1) Piolihi-olihi Desa Pakraman Jungsri luire:
 - ha. Piolihi-olihi saking palaba pura;
 - na. Urunan saking krama adat;
 - ca. Paica saking Guru Wisesa;
 - ra. Dana punia siosan;
 - ka. Panahub krama desa sane magenah ring dura desa;
 - da. Pananjung batu;
 - ta. Piolihi-olihi saking Lembaga Perkreditan Desa;
 - sa. Swinih saking bangket, sane kecokan toya saking Pura Beji.
- (2) Prajuru desa wenang ngetangang pamupon laba pura lan sapanunggalan padruwen desa;
- (3) Pikolihi lan pamuponnya kaanggen ritatkala piodalan saha mapawangun ring pura;
- (4) Sakaluring padruweyan desa patut wenten lekitannya;
- (5) Tan kalugra ngadol utawi ngesahang padruweyan desa yan tan kasungkemin antuk krama desa sareng sami.

CATURTHA SARGAH

SUKERTA TATA PALEMAHAN

Palet 1

Indik Karang, Tegal lan Bangket

Pawos 19

- (1) Sahananing karang pomahan hugi mangda masengker, pidabdab nyengker megaleng ka dulu, panyengker sane sisi kangin miwah kaler, patut kakaryanin antuk sang ngenahin karang punika, sajaba karang ngele, wiyadin lingkehin rurung, lan palemahan suwung;

- (2) Sang sapasira hugi ngenahin karang tegehan, patut naku tegehe asukat natah dangsah, sane tebenan wenang nyusunin tembok;
- (3) Yan wenten pakarangan pura, pomahan, tegal, carik, miwah palemahan sawosan kabebeng tan madruwe margi, rurung miwah papunduk, sang madruwe patut ngatengahang babawos ka desa, prajuru desa yogya negdeg, ngutsahayang mangda polih margi malarapan sami suka, yan patut matumbas manut pangargan tanah sane kamanggehang antuk sang amawarat, sami kataur antuk sang mamuatang;
- (4) Prade wenten pagehan karasayang ngalikadin, yan pada arsa panyandinge kengin watese nganggen pinget kewanten marupa pracihna pal saking Guru Wisesa.

Pawos 20

- (1) Yan wenten krama ngalalah saluiring babaedan wiyadin wawatesan, luire babaedan wiyadin wates pura, karang pomahan, carik, tegal, setra, telabah, jlingjing, margi, rurung, papunduk miwah sane sawosan, yogya kadanda, kg beras tur ngawaliang sane kalalah, prade sane kalalah kasinanggeh genah suci, sajaba kadanda lan ngawaliang sane kalahlah, maweweh panyangaskara ring genah inucap;
- (2) Yan hana sinalih tunggal ngaletihin, ngarucakin, ngarobedin, ngararabin palemahan liwaring pomahan padruwennyane luire: ngutang luhu, bangkaan, miwah saluir ipun, nyorongang babanyon sajaba toyan sabeh, kadanda kg beras tur nahayu sane kaletihin, karucakin, karobedin, kararabin inucap ring ajeng.

Palet 2

Kakayonan

Pawos 21

- (1) Ngawit nandur kakayonan tanem tuwuh ring karang pomahan patut adepa agung ngajerowang saking watese, prade ngalintang wates patut ketortor antuk sang nruwenang;
- (2) Yening wenten wit taru ngalintang wates, samalihne mawastu mayanin yan pada arsa patut katortor olih sang nruwenang, yan prade tan kalaksanayang, panyandinge utawi sang kajerihan patut matur supeksa ring prajuru desa, tur prajuru desa maritetes, prade yukti taru inucap ngalintang, patut karebah sanistania patut katortor antuk sang kajerihan saha kasaksinin antuk Prajuru Desa;
- (3) Prade sadurunge kalaksanayang kadi inucap, raris rebah taru inucap saha mayanin sang kajerihan, sang nruwenang kayu patut keni prabeya karubuhan;
- (4) Prade wenten anak ngarebah utawi nortor taru mawasana mayanin, sang keni prabeya wantah sang ngarebah utawi sang nortor maweweh panyangaskara;
- (5) Prade wenten sarwa tatanduran mentik ring babaledan sawawaning pagehan patut karebah kasaksinin antuk prajuru desa tur taru inucap kapinara tiga.
- (6) Krama desa patut ngamanggehang kawerdian tanem tuwuh sane ngawinang desane asri tur lestari.

Palet 3

Wawangunan

Pawos 22

- (1) Wawangunan jroning karang pomahan, hugi nganutin Tri Mandhala, Utama Mandhala sanggar panguluning karang, Madhya Mandhala pagenahan pomahan, nista Mandhala ngaran lebu lan jabayan;

- (2) Tan wenang ngungkulang capcapan wawangunan ka jroning karang pomahan sawosan tani druwe, yan wenten mamurug wenten ngatengahang ka desa, yogya prajuru desa negdeg, saha nyipat gantungin, yan yukti lintang, sajroning ... rahina saking puput babawose mangda sampun kapastika;
- (3) Tan wenang nganggen tembok umah wiyadin panyengker tani druwe, wenang kasambatsara antuk sang madruwe, yan akas tur mamurug sang kasambatsara yogya katengahang ka desa, kabawosin antuk prajuru desa;
- (4) Sang sapa sira hugi pacang mapuwangkid nepi ring margi agung, nepi ring rurung desa, yogya wenten lekita palugrahan saking sang amawarat, wiyadin lekita palugrahan prajuru desa, yan tan polih lekita palugrahan padgata kala wawangunan punika dados katundungin tan ngetang prabeya tatundungan;
- (5) Sang sapa sira hugi ngawangun karang pomahan, yogya hurati miyara kaasriyan lebuw pakarangannya, rurung pentasan pinih sor asukat karangnya ngalajur;

Palet 4

Wawalungan

Pawos 23

- (1) Sane kinucap wawalungan, sakancan buron suku pat sane nyadya kapyara sakadi: bawi, banteng, kambing, kebo, misa, jaran miwah sapanunggalan ipun, taler watek makampid sane nyadya kapyara sakadi: ayam, itik, angsa, dolong miwah sabacakan ipun;
- (2) Sang sapa sira ugi krama desa sane miyara wawalungan suku pat, sajaba asu, tan wenang ngelumbar, sane patut matlusuk mangda matlusuk, sane tan patut matlusuk mangda mategul, sane patut maglogor, makandang mangda maglogor, makandang, mangda tan ngarucakin, ngaletihin palemahan tani druwe miwah mamayen krama desa jana pada, yan asu mangda mabelat, luire makalung baong, maka cihna wenten sane miyara;

- (3) Sang sapa sira ugi krama desa miyara watek suku kalih, watek makampid, yatnain ugi, mangda tan banget ngarucakin, ngaletihin, palemahan, pomahan, tatanduran druwen anak sawos;
- (4) Tan wenang ngangonang, negulang, hingon-ingon ubuh-ubuhan ring palemahan tan druwe, minakadi tan sasakapan druwe yan tan kapisukayang, sang madruwe palemahan, prajuru desa, pacalang desa asing manggihin wenang nyambatsara sang madruwe wawalungan ika, yan akas sang kesambatsara wawalungan ika wenang kataban, prajuru desa yogya niwakang pamidanda manut lokika gung arta manut pasuara;
- (5) Tan wenang ngangonang, negulang ubuh-ubuhan ring karang pura, kahyangan salwir ipun, minakadi setra, rurung, papunduk, margi, telajakan tan druwe, palemahan sane kapingitang, karang suwung miwah sabacakan ipun, yan wenten mamurug, sang madruwe palemahan, prajuru desa. Pacalang desa sinalih tunggil asing manggihin wenang nyambatsara, saha naban wawalungan ika, katengahang ka desa katiwakan danda gung artha manut pasuara, saha mahayu yan wenten karusakan, tur mrayascita palemahan ika sane nyandang prayascita manut panglokika;
- (6) Yan wenten maubuh-ubuhan sajroning karang pomahan, hugi tlajan mratiyaksayang kandang ipun, mangda tan ngawetuang bhaya panyungkan, taler mangda hapik, guriten, siksa, mangda tan kantos ngaletihin, ngobetin, cerobo karang pomahan wiyadin palemahan panyandinge, yan wenten mamurug, tan siksa ring hingon-hingon miwah kandang ipun, wenang panyandinge nyambat sara, wenang katengahang ka desa, prajuru desa nepasin, wenang katiwakin danda manut pasuara;
- (7) Sang sapa sira ugi krama desa ngwangunang kandang wawalungan buat adol atuku, kandang ayam, itik, miwah sapanunggilan ipun, buat naluhang miwah adol atuku, yan kandang wawalungan suku pat dagingan adasa ukud, yan kandang

ayam itik, miwah sapanunggilan ipun, dagingan satus ukud sowang ika wenang jroning karang pomahan, yan lintangan ring punika daging kandange tan wenang wangunang jroning karang pomahan, yogya kawangunang ring palemahan sane mawaneng sator ipun seket depa saking karang pomahan, sèkolah, pura kahyangan, minakadi genah sane kakeker antuk Desa Jungsrri, tur mangda malekita palugrahan saking sang amawarat;

- (8) Yan wenten wawalungan ngarucakin, ngerug tatanduran wenang taban, sang madruwe tatanduran ngatengahang ka desa pramangkin, kabawosin antuk Prajuru Desa, saha katiwakin danda manut lokika;
- (9) Yan godel banteng, kebo, misa durung matlusuk, godel jaran, kambing mwah sabacakan ipun, durung hantes mategul, tan wenang taban yan tan ngajak hinan ipun, yogya selabarang ring sang madruwe;
- (10) Yan bebek, dolong, angsa, ayam miwah sapanunggalan ipun, ngarucakin tatanduran, taler wenang taban, indike naban mangda masaksi, saha kasupeksayang ka desa pramangkin Prajuru Desa yogya mawosin, tur niwakang pamidanda manut panglokika;
- (11) Sang sapa sira hugi, krama Desa Jungsrri tan kalugra nyorogang bebanyon laleteh kandang wawalungan ka telabah, jlingjing, sane wenten sajroning Desa Pakraman Jungsrri, yan wenten mamurug katiwakin pamidandan antuk Desa Pakraman gung arta manut panglokika, saha sajroning 7 (pitung) rahina saking pamuput babawose, tan kari sorong bebanyon miwah laleteh punika;
- (12) Sang sapa sira hugi ngarereh ulam ring tukade, ring telabahe, ring jlingjinge, miwah saungwaning ulam sawawengkon Desa Pakraman Jungsrri, tan wenang nganggen tuba, setrum salwir ipun, ngarusak hempel, miwah temuku, yan wenten mamurug, wenang katiwakin pamidanda gung arta manut lokika, saha mahayu sane karusakang;
- (13) Sakancan dadandan, dadosan sane mungguh ring ajeng, sami mantuk ka Desa Pakraman Jungsrri.

Palet 5

Sukerta Pamitegep

Kaping 1

Indik Bhaya

Pawos 24

- (1) Parindikan bhaya luire: Jiwa bhaya, artha bhaya, geni bhaya, toya bhaya, lan bayu bhaya.
- (2) Sang manggihin sinalih tunggil Panca Bhaya dados nepek kulkul manut cihna bhayane;
- (3) Prade ring desa wenten kapanca bhaya, desa punika kasinanggeh leteh, desane ngaturang panyangaskara pabersihan yan bhayane sangkaning pakardin manusa sang malaksana patut katurang ring sang amawarat.

Kaping 2

Panyanggran Banjar

Pawos 25

Saluwiring karya Panca Yadnya sane kalaksanayang antuk krama desa inucap dados nunas penyanggran banjar.

PANCAMA SARGAH

SUKERTA TATA AGAMA

Palet 1

Indik Dewa Yadnya

Pawos 26^o

- (1) Palinggih utawi panyiwian Desa Pakraman Jungsrri luire:

ha. Pura Puseh;

- na. Pura Dalem;
- ca. Pura Ulun Swi;
- ra. Pura Pasucian;
- ka. Pura Beji.

(2) Puja wali ring sowang-sowang kahyangan inucap kadi ring sor:

- ha. Pujawali ring Pura Puseh ngatahun, rikala rahina Buda Wage uku Kulawu;
- na. Hiyosan dangsil miwah hiyosan Sri ngantos dadawuhan saking De
Bungaya;
- ca. Hiyosan Batara Tirta napkala purnama Kapat ngiring desane ring Bungaya;
- ra. Puja wali ring Pura Dalem, sasampun 60 (enem dasa) rahina aci ring Pu
Dalem Bungaya;
- ka. Pujawali ring Pura Beji kalih Pura Ulun Swi, nemonin purnama Karo, y
purnamane nemonin busaya pujawaline dados harep hungkurang arahina.

Pawos 27

(1) Saluiring aci-aci ring kahyangan desa, yan tan kapuput antuk Ida Padan
wenang kapuput antuk pamangku desa;

(2) Ngadegang pamangku desa;

ha. Ngambil saking keturunan purusa I Kreceh sane sareng madadia ri
padadian I Wayan Purni;

na. Sangkaning kajujuh turmaning kabriyukin antuk krama desa.

(3) Tan wenang kaanggen pamangku luire:

ha. Cedangga;

na. Mabukti sungkan;

ca. Mabukti nahen malaksana corah.

(4) Prabeya ngawintenin pamangku kamedalin saha kalaksanayang antuk sa

ngadegang, minakadi krama desa utawi pangempon pura soang-soang.

*Wayan
Purni Desa*

Pawos 28

(1) Swadharmaning pamangku luire:

- ha. Ngenterang upacara piodalan ring kahyangan desa;
- na. Pamangku patut nganutin sasanan pamangku;
- ca. Prade salah sinunggil pamangku desa kapialang dados ngaturin pamangku desa siosan.

(2) Patuwas pamangku desa luire:

- ha. Babagian saking sarin canang;
- na. Saluiring duman;
- ca. Kakalapan ;
- ra. Luput karya sinalih daging;
- ka. Polih pangangge saperadeg, sanunggil pujawali ring Dalem, minakadi ring Pura Puseh;
- da. Polih beras seket kilogram sadiri-sadiri sanunggil pacaruan sasih Kasanga;
- ta. Sinalih tunggil pamangku yan katekan pati, yogya tiniwaken, patut polih patulung prabeya atitiwa, saking krama pura sane kaamongin, agung alit patulunge nganutin pamutus babawos sajroning paruman kala punika, yan wus tiniwakan patut kakaryanin pangelad wiyadin papegatan antuk krama pura inucap, punika yan pamangku kari rajeg ngamong swadharmaning pamangku kantos antaka.

Pawos 29

Pamangku kagentosin majalaran antuk:

- (1) Mapinunas marariyan saking patut pinunase, nanghing tan kari ngalaksanayang dharmaning pamangku, kawekas kalaning seda tan polih patulung prabeya atitiwa;

- (2) Saking patut pinunase majalaran antuk lingsir, sampun tan mampuh, sungkan rahat tan kengin waras, kajadayang antuk krama pura wiyadin desa, kawekas kalaning seda patut polih patulung prabeya patitiwan;
- (3) Sangkaning kahusanang, majalaran antuk laksana mamurug sasanan pamangku, kawekas kalaning seda tan polih patulung prabeya atitiwa.

Pawos 30

Kasukertan Kahyangan ring desa:

(1) Sane nenten kalugra ngaranjing ka pura luire:

ha. Sang katiben cuntaka, sakadi sebel ngaraga:

1. Sebel kandel ngrajaswala, lamine sadurung mabersih;
2. Sebel ngembasang putra, karuron lamin ipun 42 rahina;
3. Sebel pangantenan lamin ipun sadereng mabeyakala widhi widhana pawiwahan;
4. Cuntaka sangkaning kapademan tigang rahina saking pamuput karya turmaning sampun mabersih;
5. Parabian sangkaning tan mawidhi widhana, rare sane embas tan sangkaning pawidhi widhana sadurung kawntenang wiyadin kamargiang upacara prayascita;

na. Wawalungan suku pat sajabaning mapepada;

ca. Parilaksana sane tan kawenangang ring pura luire:

1. Masumpah wiyadin macoran sajawaning sampun pituduh prajuru desa;
2. Sang sapa sira ugi rikalaning makemit ring pura kahyangan, yan merem tan kalugra madukan lanang istri, sajaba anak sane kapineh kari alit durung rumaja putra, yan mamurug keni danda manut pangargan beras 10 (dasa) Kg, tur mrayascita pura punika.

3. Pura Kahyangan tan wenang anggen sajaba ngalaksanayang upacara agama Hindu, yan wenten macihna mamurug, sang malaksana kawangdeang, tur pakardinya kapuceh saha sang ngalugrain kadanda manut pangaran beras 10 (dasa) Kg, maweweh ngawentenang upacara panyangaskara.
- (2) Yan wenten anak karauhan utawi kapangluh ring pura, patut kasanggra antuk prajuru, prade kasumangsayan patut kapintonin antuk dupa akatih manut panglokika, yan tan jati patut kagingsirang ke jaba, prade ngawetuang karusakan kadanda 10 kg beras, turmaning ngawaliang barang sane rusak maweweh panyangaskara;
 - (3) Prade kahyangan kahanan kadurmanggala utawi kaletihan, minakadi kapanca bhaya, sang sapa sira hugi sane riyinan manggihin patut digelis nyadokang ring prajuru mangda prajuru marumang krama desa, tur ngawentenang upacara sapatutnyane.

Palet 2

Indik Resi Yadnya

Pawos 31

- (1) Sang pacang mapodgala utawi madwijati, sawawaning nunas lugraha ring sang amawarat, patut matur supeksa ring prajuru desa;
- (2) Sang ngawangun karya patut ngaturang punia ring sang katuran muput karya.

Palet 3

Indik Pitra Yadnya

Pawos 32

Pangupakara sawa luire:

- (1) Pamargi pangupakara sawa, hugi manut linging sastra agama Hindu, wenten akudang-kudang soroh, sakadi kinucap ring sor puniki:

- ha. Mapendem ring prathiwi;
 - na. Makingsan ring geni;
 - ca. Atiwa-tiwa, palebon, ngaben ;
 - ra. Yan rare durung makupak untu, rare durung kepus udel, wenang ngangge pangentas bangbang utawi ngalungah;
- (2) Sang sapasira ugi krama Desa Pakraman Jungsri, tan kawasa makta sawa ka Desa Pakraman, yan sawa ika sampun keni pangupakara sawa, hamung dados upakarain ring talutug, yan wenten mamurug yogya katiwakin danda mrayascita marisudha Desa.
- (3) Saluwiring upacara atiwa-tiwa, palebon, ngaben, ring setra hugi kawenangannya, tan wenang ring Desa Pakraman, sajaba layon Ida Padanda, yan wenten mamurug wenang danda marisudha Desa, krama Desa sang atatulung danda artha kang sadiri;
- (4) Yan wenten krama desa ngurung sawa, macamana, mabresih kawenangannya, tan kalugra lintangan ring tigang sasih ngawit dina sedane, yogya murnama tilem. Padgata kala kalaning ngurung sawa ring Desa Jungsri kawangunang karya agung, yogya tumpang salune tedunang saking balene, genahang ring natah umahe;
- (5) Tan wenang nyekeh sawa, yan tan macamana, mabresih, lintangan ring roras rahina ngawit saking dinane seda, yan wenten mamurug, danda gung artha 10 kg beras saha mrayascita Desa;
- (6) Sang sapasira ugi Desa Pakraman Jungsri, tan wenang atiwa-tiwa, rikala pangaci-aci ring pura desa, yan wenten mamurug, danda mrayascita desa, minakadi krama desa sane matulung danda gung artha kang sadiri;
- (7) Yan wenten sinalih tunggil krama desa mendem sawa kalaning dina larangan kadi kinucap ring ajeng kawasa, nanghing hugi masawen, durung masusunin bintak, laku kingsan ngaran;

(8) Yan makingsan ring gheni, sawa gineseng, hasti hinanyut manut krama, mungwing dewasa sa sor ipun dewasane dados marginin mendem sawa;

(9) Indik Padewasan :

ha. Padewasan mendem ring prethiwi, makingsan ring gheni, wenang katiwakin antuk keliang desa pakraman;

na. Padewasan atiwa-tiwa, katiwakin antuk Ida Padanda sane pacang muput, yogya kapatut antuk prajuru Desa;

ca. Indik larangan ngupakara sawa (sajaba ngunggahang ka tumpang salu), sawawengkon Desa Pakraman Jungsri luire: Buda Wage, Saniscara Kliwon, Anggara Kliwon, Redite Umanis, Sukra Pon, Saniscara Wage, Redite Kliwon, ika semut dedulur. Sukra Kliwon, Saniscara Umanis, Redite Pahing ika kala gotongan, yan ring dora, miwah ring tanggal panglong ping 15, tanggal panglong ping 14, miwah tanggal panglong ping 1; Wrespati nuju tanggal panglong ping 1, 8, yan ring Wrespati ingkel wong.

ra. Tan wenang ngagah ngulung, teges ipun, sajroning setra tunggal tan dados mresihin sawa, nuju dina pengutangan yan ring setra punika wenten ngalaksanayang pangabenan.

(10) Yan wenten sawa kapariangken ring wawengkon Desa Pakraman Jungsri, ingaranan bedagan desa, yogya prajuru desa nguduhang krama desa mendem ring setra pangilang-ngilangan ring wawengkon Desa Jungsri, sasampun polih lugraha saking sang amawarat.

(11) Yan wenten sawa sangkaning salah pati, angulah pati, mati kapangawan minakadi saluwir ipun, desa tan ngalarangin yan sawa punika, tiniwaken pramangkin, sara ledang sang madruwe, minakadi Ida Padanda sane pacang muput;

- (12) Yan wenten sinalih tunggal sawa, genahe seda wiyadin padem, sajabaning karang pomahan, luire ring tegal, ring carik, pura, pasar, banjar, sekolah minakadi genah sawosan dudu karang pomahan, yoga sang madruwe wirange mrayascita marisudha genah punika, yan sawa tan kapariangken, genah punika patut kaparisudha kaprayascita antuk sang madruwe hemponan.

Pawos 33

(1) Lwir sane kinucap cuntaka:

- ha. Anak istri kalaning ngrajaswala, suwen cuntakane saking ngawit ngrajaswala, kantos nyat, macihna sampun malukat;
- na. Sang nganten lanang istri, suwene cuntaka ngawit saking rahina pangantenane wiyadin rahina marangkate, sajroning tigang dina, kantos puput mabyakawon, saha samayut prayascita malukat matirta;
- ca. Rama rena cuntaka sangkaning madruwe oka, sane lanang cuntaka, suwene saking embas anake alit kantos kepus odelnyane, raris malukat, sane istri pinaka rena cuntaka petang dasa kalih rahina saking wawu embas rarene;

(2) Cuntaka malarapan antuk kasedayan utawi kapatayan:

- ha. Yan sang ngarepin, minakadi sang magenah sajroning karang pomahan sang seda, suwene cuntaka, saking wawu seda kantos puput panglemek karyane, mawaneng malih tigang dina, punapike mapendem, lwir yan atitiwa, macihnayang punah cuntakane antuk marerebu malukat;
- na. Yan sang polih ninjo, ngarap sawa, ngamel saha ngarembat saeteh-ete upakara pula palining sawa, cuntaka tigang dina punah cuntakane macihnayang antuk malukat;
- ca. Yan sang manjing mijil ring umah sang ngaraksa sawa, sasuwen sawa wiyadin layon karaksa, pateh cuntakane kadi sang ngarepin sawa ika, lwih yan tunggil sidhikara;

12. Yan sang manjing mijil ring umah sang ngaraksa sawa wiyadin layon sangkaning aninjo, tan kahanan cuntaka waluya mapas sang makta sawa ring margi agung;
- ③ Cuntaka sangkaning malaksana mamitra ngalang, suwene cuntaka salamine mamitra ngalang;
- ④ Anak wetu sangkaning semara dudu utawi tan pawidhi widhana, bebinjat ngaran punika taler cuntaka, suwene cuntaka selamine durung wenten meras wiyadin maduk ngangkenin piyanak, wiyadin nganggen dadaman;
- ⑤ Cuntaka sangkaning macihna madruwe panyungkan sane tan dados waras salamine, kadi angganing hila, buduh, ngawijilang reged saking silit, bhaga, purus, tan henap mameres, berung borok tahunan mabanyeh, miwah saluwir ipun, suwene cuntaka salamine tan waras;
- ⑥ Yan wenten sinalih tunggil sang cuntaka ngaraksa sawa wiyadin layon, mamanah utawi mapakayun ngarauhin karya hayu atma wedhana, minakadi mabakti ring sang wenang baktinin, dados, nanghing tan wenang ngarap, ngarembat, nyuwun, ngamel saupakaran puspa lingga;
- ⑦ Yan wenten sinalih tunggil krama desa durung tutug cuntaka kadi kinucap ring ajeng, mamurug larangan, yan wenten ngatengahang ka desa, prajuru desa niwakang pamidanda yogya sang mamurug marisudha sakabuatan manut panglokika;
- ⑧ Yan cuntaka gamia gamana, prajuru desa ngaturang sang malaksana ring sang amawarat, yan sampun wenten pamutus, katiwakan danda kadi ring sor puniki luire: mrayascita raga, genah malaksana, kahyangan desa, miwah desa pakraman, prade sang katiwakin pamidanda mamandal, prasida desa mrayascita, tur sang malaksanaka kabawosin saha kaicen pamutus antuk prajuru desa, manut pamutus pararem desa;

- (9) Cuntaka sahananing macihna salah timpal, cuntaka ragan sang malaksana miwah desa pagenahannya, tutug cuntakannya yan sampun sang malaksana mrayascita panyangaskara raga, genah malaksana, salanturnya desa mrayascita desa;
- (10) Anak luh beling tan kapariangken, suwene cuntaka kantos lekad rarene, saha wenten pangupakara Kulawisudha;
- (11) Yan wenten anak macihna nyolong samara, cuntakannya pateh ring cuntaka gamia gamana.

Palet 4

Indik Manusa Yadnya

Pawos 34

- (1) Upacara Manusa Yadnya inggih punika upacara-upacara dharmaning kahuripan manusa ngawit saking patemoning kama bang lan kama petak sajroning garba ngantos seda;
- (2) Rikalaning ngamargiang upakara Manusa Yadnya hamung patut ring liwaring pura-pura Kahyangan Jungsri;
- (3) Upakara Manusa Yadnya madudonan sakadi ring sor:
 - ha. Magedong-gedongan utawi garba dhana, ngawit pangerempinian Ibiyang;
 - na. Ngawit sang rare medal;
 - ca. Kepus puser;
 - ra. Roras rahina;
 - ka. Tutug kambuhan;
 - da. Nigang sasihin;
 - ta. Paotonan;
 - sa. Tutug kelih, ngraja swala sane wadon, ngembakin sane lanang;
 - wa. Matatah utawi mapandes;
 - la. Mawiwaha.

- (4) Upacara-upacara inucap kamargiang nista, madya, utama manut sastra agama miwah dresta.

Palet 5

Indik Bhuta Yadnya

Pawos 35

- (1) Bhuta Yadnya inggih punika pabeyakalan ring Ibu Pertiwi miwah Kahyangan majeng ring sarwa prani miwah ring sarwa babhutan;
- (2) Upacara pabeyakala ring perthiwi, kahyangan lan babhutan kawastanin macaru;
- (3) Pacaruan hinucap ring ajeng nista, madya, utama manut wiguna kadi ring sor puniki:

- ha. Eka Sata;
- na. Panca Sata;
- ca. Panca Sanak;
- ra. Panca Kelud;
- ka. Tawur;
- da. Balik Sumpah;
- ta. Tabuh Gentuh.

Pawos 36

- (1) Nangken ngawarsa rikalaning Tilem Kasanga kawentenang caru Kasanga, kalanturang ngarupuk, maka cihna pacang mapag rahina panyepian;
- (2) Brata panyepian sane kamargiang antuk krama desa:
- ha. Amati geni, tan kengin maapi-api, sajawaning malarapan anak madruwe rare durung tutug tigang sasih, matepetin anak sungkan, madruwe layon utawi kasedayan, ring sang sane kasinanggeh ring ajeng patut matur supeksa ring Prajuru Desa Pakraman ;

- na. Amati karya, tan kadadosang ngarembat karya utawi nyambut karya sahananing karya;
- ca. Amati Lalangan, tan kengin maoneng-oneng, masuara gora lan sapanunggilannya;
- ra. Amati Lelungan, tan kadadosang malalungayan, sajabaning wenten pabuat pamargi sakadi panca bhaya, ngarereh tamba utawi anak jagi ngembasang putra;
- (3) Pabratan hinucap kamargiang saking semeng ngantos ngedas rahina;
- (4) Yan prade ritatkala ngamargiyang catur brata penyepian wenten salah sipunggil sameton krama seda, upacara utawi pula paling kasedayan kamargiang sasampun wusan ngamargiang catur brata panyepian inucap;
- (5) Sang mamurug kecaping ring ajeng keni pamidanda gung artha manut pararem kamargiang antuk petilik utawi langlang desa.

SAD SARGAH

SUKERTA TATA PAWONGAN

Palet 1

Indik Pawiwahan

Pawos 37

- (1) Pawiwahan inggih punika patemoning purusa lawan pradana malarapan sami demen kadulurin upasaksi sakala niskala;
- (2) Pawiwahan inucap nganutin awig-awig Desa Pakraman Junggri lan pasukertan sang amawarat, tur mangdene prasida kalaksanayang patut kasaksinin olih prajuru desa;
- (3) Pamargin pawiwahan luire:
- ha. Papadikan, maduluran antuk suka cita sangkaning paigum pakayun kulawarga sang kalih;

- na. Marangkat utawi ngarorod, malarapan antuk suka cita lanang istri, wate pajatine arahina awengi;
- ca. Akeh pejatine paling kedik 4 (petang) diri, patut mabusana adat;
- ra. Mapajati patut ring reramane twi, yan tan wenten patut karauhang ring war ka purusa;
- ka. Prade pamargin rangkate kasumangsayain sang madruwe wirange dadu ngamargiyang panegdeg, nanghing mangda kasarengin olih Prajuru Desa kalih sang amawarat;
- da. Ring sajroning ngamargiang panegdeg tan kawenangang makta saluwirin senjata;
- ta. Sadurung ngaluku utawi makta jauman, sang ngambil patut ngamargiyang pangendek malih ring sang madruwe oka sane kaambil, riantukan ngantenang pamargin jajaumane;
- sa. Yan wenten ngarangkatang saking dura desa patut nguningayang ring Prajuru Desa Pakraman muang sang amawarat;
- wa. Yan wenten pangetut saking kulawargan sang karangkatang patut mat supeksa ring prajuru desa kalih sang amawarat.

Pawos 38

(1) Parabian sane tan kapatutang kadi ring sor:

- ha. Tan dados ngarangkatang tumin dia nyama;
- na. Tan dadis ngarangkatang pianak temen, pianak dia nyama, rerama dia nyama, sameton sodet, sameton sios ibu, sameton paperasan, yan went mamurug wicarannia digelis katur ring sang amawarat;
- ca. Sane malaksana gamia gamana patut katur ring sang amawarat;
- ra. Yan wenten mlegandang anak istri patut wicarannia katur ring sang amawarat.

- (2) Yan wenten krama desa sane marabian ka dura desa, ring pamuput utawi maserah, mangda kasaksinin antuk prajuru desa, yan mamurug pawiwahan punika kabawos tan prasida puput;
- (3) Yan wenten anak istri bobot, saking pakardin anak lanang durung madruwe rabi, saha sabda kapariangken, prajuru desa mangda ngutsahayang sang kalih ngalaksanayang upacara widhi widhana pawiwahan, yan prade mamurug wicarannia katur ring sang amawarat.
- (4) Yan wenten anak istri katenger ngamaduang anak muani wicarannia patut katur ring sang amawarat;
- (5) Yan wenten anak lanang sampun madruwe rabi katenger ngarucakin anak istri, wicaranya patut katur ring sang amawarat.
- (6) Yan wenten rare embas saking bobotan tan mawidhi widhana, patut digelis rare punika kaperas;
- (7) Yan wenten anak istri bobot, sang kaladiah mobotin tan kapariangken mapakardi, wenang sang kadalih, saha sang bobot madewa saksi ring sinalih tunggil Pura Kahyangan Desa, kasaksinin olih prajuru Desa, tur wicarannya katur ring sang amawarat.

Palet 2

Indik Palas Marabian

Pawos 39

- (1) Parabiane prasidha husan malarapan antuk palas utawi kapademan;
- (2) Wusan makurenan riantukan sinalih tunggil seda mapiteges balu;
- (3) Palas marabian wenten sangkaning pada lasia, sangkaning mawiwit wicara macihna tan tumus suka citaning panunggalan idep sang alaki rabi mapiteges nyapihan;
- (4) Tata cara palas marabian:

- ha. Yan wenten krama desa mapakayun jagi palas marabian patut matur supeksa ring prajuru desa, olih prajuru desa wicarannia kabawosin, tur kaicen tatimbang pamutus ring sangkepan desa;
 - na. Yan tatimbang prajuru desa tan katrima, wicaranya patut kalanturang ring sang amawarat.
- (5) Prade riwekas sang palas marabian macihna adung malih patut ngalaksanayang upacara pawidhi widhana pawiwahan.

Pawos 40

- (1) Soang-soang balu manut kawongannya kabinayang dados:
- ha. Balu tan pasentana utawi balu camput;
 - na. Balu masentana.
- (2) Swadharmaning balu inucap:
- ha. Pageh ngarajegang swadharmaning balu;
 - na. Kengin ngidih sentana prade wenten kacumipun antuk kulawarga sinanggeh purusa;
 - ca. Ngawisesa warisan, pagunakaya, nanging tan dados ngadol, ngadeang, makidihang sajroning durung polih pamutus paigum saking sang patut ngawaris.
- (3) Balu kaucap tan pageh sakadi ring sor:
- ha. Mabukti matilar saking pomahan tan pasadok, jantos tigang sasih;
 - na. Malaksana jalir ngantos ngawetuang wicara.
- (4) Prade wenten Balu pageh nganutin swadharmaning balu, raris katundung antuk santananya utawi kulawarga ka purusa, wenang prajuru ngicen tatimbang pamatut, yan tan kacumipun wicarannia katur ring sang amawarat.

Palet 3

Indik Sentana

Pawos 41

(1) Santana wenten kalih soroh luire:

ha. Prati Santana;

na. Santana Paperasan.

(2) Sang sapasira pacang meras santana patut polih lugraha saking prajuru desa.

Pawos 42

(1) Paperasan sane kabawos patut ring Desa Pakraman Junggri risampun macihna:

ha. Widhi widhana paperasan:

na. Kasaksinin antuk prajuru desa pakraman, saha kasiarang ring paruman desa;

ca. Wenten lekita ungguhan tata sulur pamargin paperasan.

(2) Sane patut kaperas anggen santana sakadi ring sor:

ha. Sang sane maagama Hindu:

na. Kautamayang saking pancer ka purusa, prade tan wenten kengin saking wadon.

Palet 4

Indik Warisan

Pawos 43

(1) Warisan inggih punika artha brana, saha ayah-ayahan ngupadi sukerta sakala niskala saking kaluhurannya harep ring turunannya;

(2) I kang sinanggeh warisan luwire:

ha. Druwe tengah makadi tegal ayahan desa, sanggah utawi merajan, pusaka miwah siwakrana, lan sapanunggalanipun;

na. Gunakaya, tadtadan utawi jiwa dana, lan utang pihutang.

Pawos 44

(1) Waris lwire:

ha. Prati sentana ka purusa;

na. Sentana paperasan.

(2) Prade tan wenten waris sakadi ring ajeng sane dados waris luwire:

ha. Turunan ka purusa kapernah ngunggahang, makadi rerama, pekak salanturnya, rerama misan, mindon;

na. Turunan ka purusa papernahan ka samping, makadi kaponakan dimisan, kaponakan dimindon, miwah salanturnya nedunang.

Pawos 45

(1) Swadharmaning waris luwire:

ha. Ngabenang pawaris;

na. Narima warisan artha brana lan miyara ngarempon paayah-ayahan upacara ring sanggah utawi merajan, pura padadian lan kahyangan desa;

ca. Nawurin utang wiyadin nerima pihutang.

(2) Babagian warisan sakadi ring sor:

ha. Warisan wawu dados kabagi olih warisnya risampun kalaksanayang upacara pitra yadnya sang ngawarisang, lan utang-utang buntas katawur;

na. Para waris polih babagian pada sane marupa pagunakaya.

(3) Sinalih tunggil waris kengin tan polih babagian prade:

ha. Nilar agama Hindu;

na. Nilar kadaton utawi sane sinanggeh nyentana;

(4) Pawaris kengin mapaweweh sakantun maurip pinaka jiwa dhana, tatadtadan bekel makacihna paweh ring oka sane marabian;

- (5) Paweh pawaris maka cihna jiwa dhana utawi tetadtadan tan dados rangkungan ring apah tigaan saking artha brana paguna kayannyane.

Pawos 46

Prade sajroning pakulawargan wenten raris rangkungan ring asiki patut:

- (1) Kawentenang paigum dumun ring sajroning sami waris;
- (2) Yan tan prasidha patut katunasang ring prajuru desa;
- (3) Prade tan cumpu ring panepas prajuru desa kengin salanturnya nunasang ring sang amawarat.

SAPTAMA SARGAH

WICARA LAN PAMIDANDA

Palet 1

Indik Wicara

Pawos 47

- (1) Sane wenang mawosin makadi mutusang wicara ring desa inggih punika prajuru utawi dulu desa saking Bungaya sinanggeh Kertha Desa;
- (2) Prade sang mawicara tan cumpu ring pamutus Kertha Desa, sang mawicara kengin ngaturang wicarannya ring sang amawarat;
- (3) Sahananing wicara patut katepasin ngantos tinglas iwang patutnya malarapan antuk kawentenan lekita bukti muwang saksi;
- (4) Sahanan pamatut tatepasan wicara tan maren nepek ring sadaging awig-awig, pasuara lan pararem desa.

Palet 2

Indik Pamidanda

Pawos 48

- (1) Desa wenang niwakang pamidanda ring krama desa sane sisip;
- (2) Banjar wenang niwakang pamidanda ring krama banjar sane sisip;
- (3) Tatiwak pamidanda kamargiang olih prajuru desa utawi banjar madudonan manut kasisipane;
- (4) Bacakan pamidanda sane kamargiang ring Desa Pakraman Jungri :
 - ha. Danda artha;
 - na. Panyangaskara;
 - ca. Kaheladang.
- (5) Imah utawi raja brana pamidanda ngaranjing dados druwen desa utawi banjar.

Pawos 49

- (1) Krama desa sane rangkungan ring tigang paruman ngalantur tan nawur urunan miwah dadandan wenang kaheladang;
- (2) Pamidanda inucap ring ajeng keni buntas risampun sang kakenenin :
 - ha. Nunas geng pangampura ring krama desa riantukan nguwah pasubaya;
 - na. Nawur sakancan utang, pangepok kaheladang saha kadulurin prayascita panyasah kahiwangan ring desa.
- (3) Yening wenten sinalih tunggal krama sane lad, mapikayun malih jagi tedun, krama punika keni pangepok beras akarung (100 kg), saha nginggasang utang-utangnya;

ASTAMA SARGAH

NGUWAH NGUWUHIN AWIG-AWIG

Pawos 50

- (1) Nguwah-nguwuhin awig-awig Desa Pakraman puniki kamargiang antuk pamutus paruman desa;
- (2) Paruman inucap mangda kadasarin antuk pakarsan krama desa paling kedik kalih pahitigaan.

Pawos 51

- (1) Sakaluwiring sane wenten sadurungnya patut kaanutang ring sadaging awig-awig puniki;
- (2) Sakaluwiring sane durung kabawos ring sajroning awig-awig puniki patut kalaksanayang manut tata cara sane sampun ketah mamargi kadulurin antuk pararem.

NAWAMA SARGAH

SAMAPTA

Pawos 52

- (1) Awig-awig puniki mawasta awig-awig Desa Pakraman Junggri;
- (2) Awig-awig puniki pinaka bantang sahananing awig-awig banjar, pura kahyangan, subak, sekeha-sekeha, sane wenten sajroning Desa Pakraman Junggri;
- (3) Awig-awig puniki kamargiang ngawit kasungkemin.

Pawos 53

- (1) Awig-awig Desa Pakraman Junggri puniki pawangun krama Desa Pakraman Junggri, kasungkemin tur kapastika manut upacara Agama Hindu, kala dina *Buda, Wage, Kliwon*, ring Pura *Pesch*....., kapuput antuk Ida Padanda *Gede Made Gianyar*.

(2) Awig-awig puniki kalingga tanganin antuk prajuru desa, kasarengin Keliang Banjar, kasaksinin antuk keliang Banjar Dinas, Kepala Desa, Camat, saha kapikukuhang antuk Bupati Karangasem.

(3) Lwir sang ngalingga tanganin:

ha. Kapertama Prajuru :

1. Keliang Desa Pakraman Jungstri,
Kecamatan Karangasem
Desa Pakraman Jungstri
[Signature]

3 Panyarikan
[Signature]
(I WAYAN CADA)

2. PEMADEN KELIANG
[Signature]
(I WAYAN DEGENG)

4. PENYARIKAN 2
[Signature]
(IKT LITANLA)

5. JURU RAKSA 1
[Signature]
(I KETUT MERIA C)

7. PETANGGAN
[Signature]
(I WAYAN KOPLOG)

6 JURU RAKSA 2
[Signature]
(I NYOMAN YASA)

8. PETANGGAN 2
[Signature]
(I WAYAN KEBENG)

na. Kaping kalih sang amawarat, maka saksi:

1. Keliang Banjar Dinas Jungstri
Kecamatan Karangasem
Desa Bebandem
[Signature]

2. Kepala Desa Bebandem
Kecamatan Karangasem
[Signature]
Gede Astawa, SE

3. Camat Bebandem,
CAMAT
BEBANDEM
[Signature]
I Ketut Adra, BA
KARANGASEM
NIP. 600004516.

ca. Kalekitayang ring Kantor Bupati Karangasem, duk rahina **BUDA WASE**

KLAWU.

Tanggal : **12 MEI 2004.**

Reg. Nomor : **02 TAHUN 2004.**



Bupati Karangasem

Sumantara Ady Prenatha
Sumantara Ady Prenatha